



# Deewiso”oo Gangalatto

Leveled



Kuni irkisaanchu maxaafi ‘USAID’inni afi’nonni woxu irkonni  
‘Save the Children’i, Rosu Ministerenna Wodiidi Daga  
Dagoominna Manni Qoqqowu Mangiste Rosu Biiro mittimmate  
sumiimmenni qixxaawe attamamino.

2009 M.D



**USAID**  
FROM THE AMERICAN PEOPLE



**Save the Children**



The CC By license lets others distribute, adjust, and build upon this work, for free or commercially, as long as credit is given to the original creation. However, any changes from the original must be indicated.


For more info please refer: <https://creativecommons.org/licenses/>



# Deewiso”oo Gangalatto

Kifile 4

Lamala 15



## Qaagiishsha

Aante shiqqino niwaawe (dhagge) illachishshannohu nabbawate huwato aanaati. Niwaawete albaanninna gedensaanni noo xa'mo dawartannota xawisatenni niwaawete mereero shiimare taxxi yitanni nabbabbinore xaphi assidhanno gede kaayyo uyiyyensa. Rosaano niwaawe nabbawate albaanni konni albaanni affinore kultanno gede xa'matenni jawaachishshensa. Konni garinni rosaanonnita niwaawe nabbawate hasatto kakkayissinihu gedensaanni niwaawe nabbawa hananfona. Rosaano irkissinanni baali, xa'muwa dawarate rosaano baala beeqqo assitanno gede jawaachishshensa. Uytanno dawarono haadhinanni taashshi'ri-tumo uyiyyensa.

### Nabbawate Albiidi Xa'mo

1. Aaniidi qooli misilera noo maate ma"assitanni no?
2. Sidaami giddo la"ate baxisanno dargi afootto(a)wi no?
3. Deewiso"oo gangalattote mamira hadhinoha lawannohe?



## Gafa Mite

### Gangalattote Assitino Qixxaawo

Deewisonna Shiqo roduuwaho. Shiqo Deewisora bayrate. Deewiso Shiqo aaniho. Shiqonna Deewiso lowo geeshsha baxantanno. Lamunku rosu minira hadhannonna higganno woyte mitteenni hadhanno. Dikko sonkinsarono mitteenni hadhara hasidhanno. Lamunku baxxitara hasidhannokkihura boohaara hasidhuro no annansanna amansa xa'midhe mitteenni hadhanno.

Deewiso”oo umikki wogga roso jeefisidhe ka’ino. Rosu mine mitte lamala fooliishsho uyinoonninsa. Tenne fooliishsho giddo Deewisonna Shiqo gangalattara fula hasidhino. Lamunku woggannita fonqolu woraqatta baalanta adhite umikki wogga hajo gudde higgino. Fonqolohono addintanni dancha guma abbitino. Deewiso soodo gute kae annisi Deerramo gutinowiinni higannoha agadhe no.

Soodo shooma shoo’mate Deerramo agarre hee’noonni. Deerramo keshshinohu kae daye cirate minira e”e barcimaho gaffi assi. Amansa Shiilo, “Deewe! Annikkira angate waa uy.” yitu. Deewisono annasi hakkaanni hige hasaawisi’rara hagiidhaminohu mitu anga hayishshiishara kai. Hayishshiishaancho haaffi asse haa’re jaarikaanunni waa xorshi. Deewiso hedinore annisi kularanna agurara wodanisinni hobbi ruxxi yii. Qolenni wodanisinni, “Hoolie waajjosi bushshuna kuleemmo; diagureemmo.” yii.

Deewiso annisira angate waa woranni hee're,  
“Anna!” yee woshshi. Deerramono, “Yee beetto'ya!”  
yii. Deewiso qolannoti, “Fonqolo gundummona  
ninkera maalla hedootto?” yee xa'mote garinni  
hanafi. Deerramo albaho waa ga'nanni hee're,  
“Massammo'nera heddinoonni?” yee qole xa'misi.

Deewiso alba wirri yee Shiqo laita shiqono kulanno  
gede qiphi assitu. Deewiso ruxxi yiikkinni, “Mitowa  
haadhe milli diassattonke? Digangalanteemmo  
maaho?” yii. Annisino, “Hanni amakki ledoo  
hasaanbeemmona agari.” yee shoomahonna buna  
agara higi. Umi buni goofeenna Shiqo layinki buna  
booso wortu.

Deerramo buna aganni hee're taxxi assino hedoo  
galagale kayse hasaawa hanafi. Hasaawasi hanafate  
Shiilo woshshe, “Diafatta Deewiso yaannota? Rodoosi  
ledo amaalaminooretiro diafoommona” yii. Shiilono  
odoo adhitara yorte, “Ma afidhinoonni?” yitu.  
Deerramono, “Roso cufi'noommona mitowa qolte milli  
assinkewe yaanni no.” yee odoo haranse uye.

Shiilono, “Gangalata yorino gedeehowe.” yite hedosi dhaabbe xawissu. Shiilono Deerramo qolikkinni rakke, “Mayyoottosiiyya?” yite xa’mitu. Deerramono, “Ani callu yeemmoyya? Yineemmore mitteenni yinammoraatiwe affino iillishoommohehu ” yiise. Shiilono, “Ate hedolla diafoommana, hige mitowa massine dileellinshanninsayya? Hanni wodanunni hedoottore abbissi.” yitu.

Deerramono, “Maahoyye. Hanni hakka Wondo Gannatenna Hawaasira qolle milli assininsaro diwoyya ikka?” yii. Amansa Shiqorano tashshi yeennase qaaquullese lamenka bado badotenni albansa la’u. Ama qoltukkinni Shiqo haaffi assite haadhe, “Anna! Wondo Gannatete maricho leellishattonkeraati?” yitu.

Deerramono Shiqo hagiidhantino gara lae faasiiqu albinni qolannise. “Iibbalicho e’inanni.” yii. Shiqono, “Anna anekki!” yite kubbite goowa sunqitu. Deewiso qolannoti, “Anna! Hawaasana? Maricho leellishattonke?” yee quqquxaminohu mitu xa’mi.




Deerramo Shiilora alba hige, “Diafitta?” yii. Shiilono, “Hawaasi Garba la’ona massinsa.” yitu.

Deewisonna Shiqo lowo geeshsha hagiidhame kuukkubbi. Deerramo dawaro qola keeshsheenna Hawaasi noori agure ruxxi yii. Shiqo annise alba seekkite la’anni, “Ee! Hawaasi Garba leellishinke ballo, Anna!” yitu. Shoolunku mimmitonsa lae boodere muushshi yite hagiidhitinota mimmitinsara leellishshu.

Jeefoteno, Deerramo lamente oososi widira alba hige, “Maahoyyena biso’ne hayishshidhine qixxaawo assexu yiinsa. Deewisonna Shiqono mimmitonsa hanqaffe hagiirrensa xawissu. Deerramo Deewiso lede woshshe, Deewiso! Ati balaxxe marte dananchokkino haxidhe amo.” yee dilgosira hige ha’ri. Deewisono rahotenni dananchosi haxi’rara Morochu Quchuma fule dodi.

Ama qoltannotino Shiqo woshshite, “Atino rakke  
salleelawa marte umo amaxxite amo.” yite qachinsara  
umo amaddanno manchowa sikkuse. Shiqono  
sharbaabba umose amaxxitara ariiffatte fulte hadhu.  
Shiqo umose biifisse amaxxite rake minira higgsu.  
Deewisono Morochoho bashshonni umo haxi’ranno  
mine mare umosi biifise haxi’re isino rahotenni  
minira hige dayi. Lamunkura hashshu giwannansa  
quqquxantanni galtu.



## Gafa Lame

### Deewiso”oo Wondo Gannatete

Layinki soodo baalunku gutte ka’u. Anga amadde hadhanno uduunne baala hashsha biddi assidhe galtino. Amanna annu lamenta ooso adhinori gute Morocho alba wodhitu. Hashshiranna soorrote ikkanno imaana wonanni ogoroho wodhite fultino. Udiinnu ayirrannonsakki gede lamewa badde wortino daafira lamu lamu bado badotenni haadhanni Morocho martu.

Deewiso”oo qae Morochu Quchumira addanko muleeti. Lekkatenni ruwu assite Morocho marte iillituti mitto Hawaasira ha’ranno kaameela afidhe shoolunku mitto kaameela gidditu. Lamu lamu mittowa ofolte hasaawa gooddanni doogonsa alba higge hadhu.

Morochoho e’ino kaameelinni marte Wondo Gannate hinge wirammanniwa “Wondo Maazooriya” yinanni darga dirritu. Hakkiinnino boodere foole qo’liteenna Wondo Gannate higge hadhanno taakise daggeenna ise giddite hasidhinowa hadhu.

Marte Cuukkote Quchumira dirritu. Hakko dirritu qarqarira mitto mine e’e shooma shoo’mitu. Shoomansa ittanni heedheenna Deewisonna Shiqo Iibballichote eela dirrate lowonta quqquxantinohura, “Ranke inte difulleemmo!” yitanni mudditanno. Shooma itte ka’uta Shiilo, “Hanni ikkinare dianfoonnina yite doogote laalo noota hirtunsa.

Laalonsa feesitaalete wodhite iibballichote eela hadhara hodhishsha hasidhu. Hakkiichira ha'nannihu Baajaajetenniiti. Shoolenka mitte Baajaaje haadhannonsakkihura lame Baajaaje kontiraata amaxxitu. Hattenne Baajaajensa e'e iibballichote eelira hadhu.

Marte iibballichote eela iillitu. Bitimaho marte e'nanni kaarime mudhite worafansa (badonsa) agadhitu. Bado agadhite heedhe hakko eelira noore la'anni kawa ka'a harantu. Hakko eelira noori illete la'annori baalu daa"achishannoreeti. Deewisonna Shiqo baalare wodani gede daa"attu.

Anninsa, Deerramo iibballichote eate bado iillitannota agarate ofolle hee'renni goowa fushshe illesinni insa higgsuwa higanni la"anni no. Shiilo kayinni ledonsa heedhe la'annore addi addire leellishshanni noonsa. Shiilo lamunku qaaquulli ikkite afoo cu'midhe uurrite noo gara seekkite la'u. Illese lamunku widira bado bado qoltanni, "Haqqenna daro ikkite biiffino gara maala'litinanni heedhinoonni?" yite xa'mitu.

Shiqo Maala'late batinyinni jalli yite amase xa'mo dimaccii shshitino. Deewiso qolannoti, "Ile'ya! Ee! Dila"atta ikke biifino gara!" yaanni illesi hakkiinni kayisikkinni lede lede maala'li. Shiilono albaanni la'inore heddanni, "Hay ooso'ya, konni arrinni daggine la'ine togo ikkitinanni! Hawado daggine la'inoommero roore maala'litinanni!" yite quqquxo leddunsa. Qolteno qubbichose gaaru widira qolte leellishshanni, "La'e! Tee"enne moolte rarra'ino haqqe baala hawado ikkiro lattino sinna maaxxe guddeenna haanjuri callu leellanno." yitanni leellishshunsa.

Shiqo hagiidhite ba'inoti mite, "Deewe hawallella dangummo. Dihagiidhootto?" yite kechi yite albasi la'u. Deewisono, "Shiqo'ya dihagiidhootto yaattae?" yee qo'likinni anninsa Deerramo woshshinsa. "Amme giddora e'neemmoti badonke iillitinona, rakke!" yee muddinsa. Baalunku ariiffatte iibballichote giddora e'u.

Shoolunku hayishshidhe hagiidhitanni fultu.  
Deewiso”oora iibballico eate umikki barransa  
ikkinohura lamenska boodere daafursinonsa. Caaleho  
ofolte wona adhite hadhu laalo: muuzensanna  
maangonsa afooho wodhitu. Laalonsa itte ka’utino  
daafuru boodere ga’labbi yaansa geeshsha  
fooliishshidhu. Hakko fooliishshidhino darga  
heedhenni wona mereeroho agurte hadhinore  
daa”atate higgsu. Cea ikkite haqqetenni haqqe  
sa’anninna addi addi huuro macciishshiishshanni  
burraaqqanno gari addinta tashshi assinonsa.

Baalunku hagiidhante ba’inohura saate dila’ino.  
Deewisonna Shiqo itanna agano habbinoha labbanno.  
La’ure baala giddonsanni daa”attanni heedhe yanna  
xiibbeenna agurte fultu. Mite gede barri sagale yanna  
sa’ara yortino. Gangalatinsanni habbino ikkinnina  
sodo ittino shoomi godowunni goofeenna kokkeno  
yortinonsa.

Wona daggu doogo agurte Shaashamanne waanna higgara hasidhu. Shaashamannete yanna jejishidhe sagaleno hakkaanni itte sa”ate hedonniiti doogo soorridhinohu. Wondo Gannate assite baxissinonsa gari agurte difultannoho. Ikkollana kayinni, mixonsa garinni Hawaasira e’e gala hasiissinonsa.

Rakke udiinnensa gamba assidhe fultu. Deerramo rahe sagale afidhannowa massansara hede lekka albira qole rahe rahe qaafanno. Wondo Gannatete Kaameelu duuna marte Shaashamannete kaameela giddite hadhu. Marte Shaashamanne iillite barri sagalensa hakkiicho ittu. Deerramoranna Shiqora bunu araado noonsa daafira mitto jawanu buna ganfanni nafara marte gaffi assite mitte mitte sine buna adhitu. Hakkiichinni ka’e boode geeshsha Quchumu mereero milli milli yite la’e, alba Hawaasira wodhitu.





## Gafa Sase

### Deewiso”oo Hawaasa

Shaashamannete keeshshano giwisinonsare dilabbanno. Deewiso”oo mixonsa garinni kayinni Hawaasira e’e gala hasiissinonsa. Yanna hawarritara martinohura kaameela afidhanno widira higge gugguuffu. Shaashamannete “Akkala Kaameelu Duuna” yine woshshinanniwa marte Hawaasi kaameela giddite Hawaasira higge hadhu.

Kaameelu manna jilbunni hogowinohura ruukkantukki marte Hawaasa iillitu. Hawaasa mitte hoteelera daallasu mine amaxxite galtu. Hashshi hurbaatensano hakko galtino hoteeleranni ittu. Daafurtinohura hashsha quchumu giddo milli yitanni boohaarantenni yannantenni amaxxitino daallasira e'e goxxu.

Soodo gutte ka'e shooma shoo'mituhu gedensaanni Hawaasi Garba la'ara alba hakka higge wodhitu.. Hakka marte iillitanni heedheenna illensa ubbinohu garbu aanaati. Garbu hala'linye kawa ka'a higge la'uta maalale ikkinsa. Hatte illenni Hawaasu aana howolote gangalatanno manna la'u. Deewiso ka"annoti, "Anna! Kuni maati? Mannu marichi aana ha'ranni no?" yee xa'mi.

Deerramono, "Tini howolote yinannite," yiisi. Deewiso afoo cu'mire hee'reenna "Tee Shiqo wore afi! Hada tenneetini howolote yinanniti!" yitu. Lamunku umo milli assite yinanna affinorena xa dagge la'inore xaadisidhu. Amansa Shiilo ka'annoti. "Kune dimannu gidde ha'ranni no Ninkeno qaaqqquullenke haa'ne

tenne howolo giddine digangalanteemmoyya?” yite Deewiso la’anni coyidhu. Hakkiinnino Shoolunku howolo giddite boodewa hadhu.

Howolotenni garbu aana gangalatte higguti qaccete ikkannore la’u. La’inorino, mannu qulxu’me itanni ikkanno garaati. Mitu manni du’rinshoonni qulxu’me itannoho. Mitu manni bu’ra qulxu’me itannoho. Wolu manni kayinni ganfoonni qulxu’me itanni wacose agannoho. Deewiso”oo tenne mannu itanninna aganni gangalatanno gara la’e yogortu.

Shiqo qulxu’mete waco aggara yorte, “Ile kunirichi coommanno ikka?” yite xa’mitu. Shiilono, “Hanni la’nossiyya! Dila’ne anfanni” yiteenna aggara gaffi assitu. Shoolunku qulxu’mete waco aggu. Gafame qulxu’me calla itte agurtinoyya du’rishamete widira qolte leellishshanni, “Anna tee”eeno lexxino ikka?” yitu.

Hakkiinnino, du'rinshoonni qulxu'me ledde ittu. Dagge  
la'inori, ittinorinna agginori baalu lowo geeshsha  
tashshi yiinonsa.

Addi addiha ceate sircho mito garbu giddo,  
mito garbu gamira la'anni dhaggeeffattu. Mite  
shiimmaadda cea, mite kayinni jajjabba cea la'u.  
Kawa ka'a higganni gangalattuwa gangalatte lekka  
fula gibbannanasa cincite fultu. Barri sagaleno  
Hawaasanni itte tashshi yaannansa xerembidhanni  
qaensa higgino. Deewisonna Shiqo lamu barri  
daa"attonni bacare afidhino.

## Nabbawate Gedensiidi Xa'mo

Biddissa : Aante shiqqino xa'mo niwaawete garinni dawari.

1. Deewiso"oo gangalatate layinkimeeshsho mamira hadhu?
2. Deewiso"oo Wondo Gannate hadhuhu ma"assitaraati?
3. Deewiso"oo Hawaasira hadhuhu ma"assitaraati?
4. Gangalatatenni maricho afi'nanni?

